



Najnačelnik regiona za 2012



Počinje izgradnja
kanalizacionog sistema

Uspješna emisija općinskih
obveznica za poslovnu zonu

Uvodna riječ NAČELNIKA OPĆINE

Poštovani sugrađani, prijatelji, saradnici



Veliko mi je zadovoljstvo što mogu najaviti XII broj našeg informativnog biltena CazINfo, samo nekoliko dana prije rođendana naše općine. Zbog toga, odmah na početku, koristim priliku da svojim sugrađanima, prijateljima i saradnicima čestitam 06. august, Dan općine Cazin. Ujedno svima želim puno uspjeha u porodičnom, poslovnom i društvenom pogledu. Iskreno se nadam da će naredni period i naredna godina svima donijeti puno sreće i uspjeha i da ćemo zajednički i dalje raditi na izgradnji naše lokalne zajednice po mjeri svakog njenog stanovnika.

Nadam se da će stranice ovog biltena pronaći put do velikog broja građana općine, naših gostiju, slučajnih prolaznika, turista i naših partnera. Zbog toga ih činimo dostupnima putem web stranice općine (www.opcina-cazin.ba), putem Centra za pružanje

usluga građanima, JU i JP i svakako putem naših mjesnih zajednica. Smatram da su naši projekti u oblasti komunikacije sa okruženjem svakim danom sve bolji i kreativniji. Vjerujem da će to naši građani prepoznati i svakako nastojati da se koriste raspoloživim sredstvima komuniciranja prema svim nivoima vlasti. Želim da naši građani budu informisani, da budu pravovremeno obaviješteni, da se aktiviraju i da daju svoj doprinos demokratizaciji društvenog prostora u kome živimo.

Ovaj broj biltena ima i jedno iznenađenje za naše korisnike. Naime, nekoliko vjernih čitalaca biće nagrađeno simboličnim poklonom Općine Cazin, sa prepoznatljivim obilježjima Općine, ukoliko pronađu nagradni kupon i donesu ga u Centar za pružanje usluga građanima ili se jave na mail-ove: press@opcinacazin.ba, kabinet@opcinacazin.ba.

Još jednom svima čestitam Dan općine Cazin!

OPĆINSKI NAČELNIK
mr. Nermin Ogršević

Intervju u povodu Dana općine Cazin Nermin Ogršević, načelnik općine Cazin

I ove godine 6. augusta obilježava se Dan općine Cazin. Šta za vas, kao prvog čovjeka Općine, znači ovaj datum?

Veliki ponos. Proglašavanje Dana općine Cazin bila je jedna od mojih prvih važnih aktivnosti na funkciji općinskog načelnika 2004. godine. Činjenica da nemamo Dan općine, kao mladom čovjeku, a nadasve ponosnom Krajišniku, bila mi je neprihvatljiva i stoga sam proglašenje Dana općine postavio kao jedan od prioritarnih zadataka. Moji saradnici i ja smo poduzeli sve što je bilo potrebno da se na Općinskom vijeću usvoji predloženi datum i da Cazin dobije svoj grb i zastavu. Sa ove distance, mislim da je to učinjeno u pravom trenutku i da smo na taj način postavili prave temelje za naš dalji rad za Cazin.

Dan općine prava je prilika za sumiranje rezultata i davanje ocjena o sadašnjem stanju. Jeste li zadovoljni onim što je urađeno i onim što se radi?

Uvijek sam za to da se energija koja dolazi iz zadovoljstva postignutim uspjehom, umjesto na pohvale i priznanja, preusmjeri u nove ideje i projekte. Takav princip rada primjenjujemo u timu

koji vodi i realizira brojne projekte u općini Cazin. A razloga za zadovoljstvo zaista ima. Naravno da se ono osjeti po okončanju pojedinih projekata ili na svečanostima koja se organiziraju za tu priliku, ali pravo zadovoljstvo dolazi kada saznajete koliko se poboljšavaju uslovi života građana općine Cazin. Tako npr. tek godinu ili dvije nakon izgradnje nekog putnog pravca shvatite koliko uštedu vremena i novca ljudi sada ostvaruju.

Putevi su ono što je definitivno obilježilo razvoj općine Cazin u posljednjih nekoliko godina. Kakvo je sada stanje nakon izgrađenih preko 200 kilometara novih puteva?

Hvala Bogu, imamo situacije da ponekad asfaltiramo posljednje metre makadama u nekim mjesnim zajednicama. Sada su sve destinacije u općini Cazin sa središtem povezane sa nekih 15-20 minuta vožnje. To značajno utječe na kvalitet života ljudi. Pored toga što naselja i okućnice izgledaju drugačije, otvaraju se mogućnosti bavljenja malim biznisom, ljudi lakše putuju do radnih mjesta, škola i lakše ispunjavaju sve ostale potrebe. Cazinska su naselja nešto na što zaista možemo biti ponosni i s velikim zadovoljstvom



odvedemo brojne delegacije gostiju iz drugih krajeva BiH ili inostranstva da im pokažemo kako „ruralna“ područja izgledaju na naš način. Pored puteva ulažemo i u druge infrastrukturne projekte. Dok je u izgradnju puteva uloženo oko 25 miliona maraka, radilo se i na uređenju i uspostavi javnih rasvjeta u naseljima za što je do sada izdvojeno 850.000 maraka. Vodosnabdijevanje je u cijelosti zaokružen projekat i tu spadamo među rijetke općine u Bosni i Hercegovini, a u taj je posao uloženo preko 10 miliona maraka. Također, među rijetkima smo koji ulažu u izgradnju, obnovu i rekonstrukciju školskih objekata, iako to ne spada u našu nadležnost, pa je za ovakve projekte obezbjeđeno preko tri miliona maraka. U želji i namjeri da svaki stanovnik općine Cazin ima sve potrebne uslove za život modernog čovjeka, ulagali smo i ulažemo i u sanaciju niskonaponske elektro-mreže, izgradnju sportskih igrališta, društvenih objekata u mjesnim zajednicama i brojne druge slične projekte. Sve što naši građani iniciraju maksimalno podržimo i uključimo se na sve načine u realizaciju. Naši građani zapravo i jesu ključ uspjeha cijele ove priče jer, što rado ističem u svim nastupima, mi imamo izuzetno vrijedne i mudre ljude koji znaju šta je kvalitet i ne žale truda da dođu do kvalitetnih rješenja.

Pored mjesnih zajednica, grad Cazin svakodnevno vidno mijenja svoje vizure i ovogodišnji Dan općine, odnosno ovo ljeto, upravo su najviše obilježeni promjenama u gradu. Dokle se došlo sa ovim projektima?

Moglo bi se reći da su oni tek otpočeli. Poneko nam pokušava servirati priču o tobožnjem preferiranju samo seoskih sredina, ali za sve što je do sada učinjeno postojala je jasna vizija i realna percepcija. Otprilike, kao kada gradite vlastiti dom, najprije pozavršavate sve poslove na unutrašnjosti objekta, a onda dolaze uređenje dvorišta i fasade. Ni u jednom trenutku nije bilo upitno da će središte Cazina itekako pratiti razvoj ostatka općine i naravno, kako to centar i zaslužuje, biti savršeno uređeno. Iako čeka na dovršetak posljednjih finisa, centralni gradski Trg Alije Izetbegovića već je u funkciji i mislim da slika govori više od hiljadu riječi. Naravno, tu je i Trg zlatnih Ljiljana koji se uređuje skupa s investicijom lokalnih privrednika Poslovno-trgovački centar „Ljiljan“. Kada je ova investicija u pitanju, općina Cazin se također može pohvaliti da je učinila jedinstven primjer prodaje

državnog zemljišta domaćim investitorima i tako ostvarila višestruku dobit koja se nastavlja koristiti upravo ovdje u Cazinu i za Cazinjane. Radi se i na uređenju parka-šetališta Stari grad u pojasu Gradske džamije. Za sada je okončana tek prva faza za koju smo sredstva obezbijedili putem Fonda Otvoreno društvo BiH, a za nastavak radova već se pregovara s potencijalnim donatorima iz Turske. Uz planiranu rekonstrukciju ulice Cazinskih brigada idu i brojna idejna rješenja za uređenje fontana, dječijih igrališta i parking prostora u samom centru grada. Ovih dana očekujemo i konačni pravni prijepis zgrade stare Gimnazije u koju ćemo smjestiti Narodnu biblioteku, gradsku galeriju i urediti funkcionalnu gradsku vijećnicu. Dakle, sve te pozitivne promjene zapravo su još uvijek u začetku i ja sam siguran da će Cazin iduće ljeto dočekati još ljepši i uređeniji.



Koje aktuelne projekte bi ste izdvojili kao najznačajnije u ovom trenutku?

To su svakako uspostava Poslovne zone i izgradnja centralnog kanalizacijskog sistema. Iako je prvi vrlo vrijedan, a drugi vrlo kompleksan i obiman u svakom pogledu, bitno je istaknuti da su oba započeta i da je i njihova realizacija u toku, a uspjeh sasvim izvjestan. Za uspostavu Poslovne zone Ratkovac obezbijedili smo miliona maraka emisijom općinskih obveznica. Sve pripremne radnje za uspostavu Poslovne zone su pri kraju i možemo u narednom periodu očekivati, nadam se, vrlo brz razvoj prehrambene, tekstilne, drvno-prerađivačke i metalne industrije. Za projekat kanalizacijske mreže do sada je obezbjeđeno preko 26 miliona maraka, najvećim dijelom donatorskih sredstava za koje su neophodne bile izuzetno kvalitetne aplikacije. Ovdje moram istaknuti da se općina Cazin s ovim

projektom definitivno nametnula kao primjer čiji uspjeh nastoje slijediti brojne druge bh sredine. I u jednom i u drugom projektu vidimo temelj budućeg razvoja općine Cazin. Kvalitetan kanalizacijski sistem značajno će utjecati na očuvanje zdrave sredine i staviti nas rame uz rame sa sredinama Evropske unije s kojima ćemo uskoro graničiti, a Poslovna zona u prvom redu donosi nova radna mjesta.

S obzirom na nekoliko različitih nivoa vlasti u entitetskoj BiH, na česta politička previranja i uopće tešku ekonomsku situaciju u regionu, koliko općina može uistinu pomoći svojim građanima da bolje žive?

Činjenica je da su vremena izrazito kompleksna i da je stanje, zbog svih pomenutih elemenata, zaista teško. Kao i u individualnim situacijama, izbor je u dvije opcije: prepustiti se stihiji, ili se boriti na sve moguće načine. Mi smo odabrali ovo drugo i ne odustajemo. Borimo se za Cazin na sve načine i ulažemo u ovdašnje ljude. Cazin je jedina općina u kojoj se izdvajaju poticaji za poljoprivrednu proizvodnju i prvi smo u registru poljoprivrednih proizvođača Federacije BiH. Stipendije za mlade su redovna stavka u našem budžetu, kao i stalno nastojanje da damo podršku obrazovanju. I ovdje smo među prvih pet općina u državi po visini izdvajanja za stipendije, a na vrhu smo i kada su ulaganja u sport u pitanju. Sve u svemu, općina Cazin se u proteklih nekoliko godina stavila u vrh brojnih pozitivnih tabela i pokazatelja uspješnog

razvoja u BiH. Te činjenice su neosporne i naš najveći poticaj da nastavimo dalje, ni slučajno se ne mireći sa općenito teškim stanjem u našoj okolini. Poštenim i predanim radom može se postići jako puno. Mi smo najbolji dokaz za to.

Kako bi Cazin trebao izgledati u budućnosti?

Apsolutno kao i svaki drugi moderan evropski grad, dodatno obogaćen svojim posebnostima koje Cazin sigurno ima. Već sada, Cazin je privredni i trgovački centar kantona. Naše su ambicije da postanemo i regionalni centar razvoja, univerzitetski grad ili u najkraćem - jedna izuzetno ugodna i kvalitetna životna sredina.

Šta bi bila vaša poruka građanima povodom Dana općine?

Jedan od glavnih razloga zbog kojih je 6. august odabran za Dan općine Cazin je taj što je na ovaj datum 1995. godine izvršena deblokada tadašnjeg Bihackog okruga i za ovdašnje stanovništvo je taj datum od ogromnog značaja. U svjetlu upravo te simbolike o otklanjanju svih blokada od Cazina i otvaranju ove sredine za razvoj i sve pozitivne procese, od srca čestitam mojim sugrađanima Dan općine Cazin! Niko nije više zaslužio ovu čestitku od ljudi koji tako iskreno vole svoju sredinu i tako marljivo rade na njenom razvoju i zbog toga ja znam da Cazin i Cazinjani zaslužuju samo najbolje kada je budućnost ove sredine u pitanju



Poticajna sredstva za poslovnu zonu Ratkovac

Zadnjeg dana mjeseca maja u kabinetu općinskog načelnika potpisan je Ugovor o implementaciji poticajnih sredstava iz Programa potpore izgradnji poduzetničkih zona u općinama USK-a, za poslovnu zonu Ratkovac. U ime Ministarstva privrede USK-a Ugovor je potpisao Ministar privrede Hase Hajrulahović, a u ime Općine načelnik Nermin Ogršević.

Ministar Hajrulahović je ovoga puta rekao kako su praksu poticaja u ovoj oblasti uveli prošle godine i sada nastavljaju sa istim planovima.

„Općina Cazin se regularno javila na poziv koji je Ministarstvo raspisalo u ove svrhe i osigurala sredstva koja će biti utrošena za otkup zemljišta“, pojasnio je Ministar Hajrulahović.

Za kompletnu izgradnju poslovne zone neophodno je obezbijediti 3,5 do 4 miliona KM. Općina Cazin će kroz emisiju obveznica osigurati milion. Načelnik Ogršević smatra da će i ova sredstva koja dodjeljuje Ministarstvo biti od koristi.

„Sa ovim inicijalnim sredstvima bićemo spremni početi sa izgradnjom poslovne zone „Ratkovac“. Ovo je naš strateški projekat i



Potpisivanje ugovora

trudićemo se da ga što prije stavimo u funkciju za potencijalne investitore“, riječi su načelnika Ogrševića.

Marketinška promocija ovog projekta slijedi u narednom periodu, jer je vrlo važno osigurati podršku građana, razumijevanje učesnika i svakako pogodnu atmosferu za investitore.

Pored Ministra Hajrulahovića potpisivanju ovog Ugovora prisustvovali su i Ministar finansija u Vladi USK Sanel Mahić i Ministar zdravstva Amir Murić.



Načelnik i ministar

Uspješna aplikacija Općine Cazin za projekat u oblasti predškolskog odgoja i obrazovanja

Na osnovu Javnog poziva objavljenog u saradnji sa Ministarstvom civilnih poslova, oba entitetska ministarstva obrazovanja, Distriktom Brčko i 10 kantonalnih ministarstava obrazovanja, UNICEF će podržati 12 izabranih općinskih programa za predškolski odgoj i obrazovanje te sufinansirati do 80% njihove ukupne vrijednosti, ili do 50.000,00 KM po projektu. Projekat Općine Cazin pod nazivom „Ja sam dijete i imam pravo na igru i druženje“ našao se na listi odabranih programa za podršku od strane UNICEF-a, pored Bijeljine, Tuzle, Laktaša, Viteza, Žepča, Teslića, Višegrada, Zavidovića, Gradačca, Vukosavlja i Jajca. Tim povodom su Predsjedavajući OV Haris Ćoalić i Pomoćnik načelnika Službe za opću upravu i društvene djelatnosti Hasan Salkić prisustvovali svečanosti proglašenja najboljih projekata. Ujedno su im uručeni čekovi prema kojima su određeni iznosi za finansiranje u pojedinačnim općinama. Prema riječima predstavnice UNICEF-a u BiH, gospođe Florence Bauer, ohrabrujuće je bilo da se gotovo 50% općina u BiH odazvalo slanjem prijedloga za poboljšanje obuhvata djece obrazovanjem u ranom djetinjstvu i da su ministarstva obrazovanja na svim nivoima bila uključena u proces odabira. „Ovo potvrđuje da postoji spremnost na svim nivoima vlasti kako bi se poboljšalo obrazovanje u ranom djetinjstvu“, izjavila je gospođa Bauer.



Na svečanosti uručivanja čekova

Projekat Općine Cazin ima podršku u iznosu od 58.060,00 KM, od čega je doprinos Općine 11.640,00 KM, dok će ostatak finansirati upravo UNICEF. Cilj projekta je osigurati najmlađoj generaciji sve uslove za optimalan tjelesni, intelektualni, emocionalni i socijalni razvoj i uspješan dalji odgoj i obrazovanje, kroz povećanje obuhvata djece predškolskim odgojem i obrazovanjem i stvaranje jednakih mogućnosti za predškolski odgoj i obrazovanje za svu djecu sa područja općine Cazin.

Učesnici projekta su JU dječji vrtić Hasnija Omanović, 11 OŠ i Udruženje roditelja djece sa posebnim potrebama „I naša djeca su djeca“. Broj djece koja će biti obuhvaćena projektom iznosi 1.920, a uglavnom se tiče djece iz ruralnih područja i djece sa posebnim potrebama. Aktivnosti koje se planiraju ovim projektom su povećanje kapaciteta za predškolski odgoj i obrazovanje kroz adaptiranje jedne prostorije u dječjem vrtiću i opremanje prostorija u osnovnim školama za predškolski odgoj i obrazovanje, formiranje mobilnog tima za obilazak područnih odjeljenja sastavljenog od defektologa, psihologa i medicinske sestre i realizacija odgojno obrazovnih aktivnosti u dva ciklusa.

Predstavnici općine Cazin



Akcija čišćenja Starih gradova

Oko 30 zaljubljenika u Stari grad Ostrožac u nedjelju, 10.06., volonterski su se angažovali u akciji pod nazivom „Otvorimo vrata starim gradovima“. Akcija je podrazumijevala čišćenje utvrde Stari grad Ostrožac, a inicirali su je Udruženje mladih „Stari grad Ostrožac“, JP „Agencija za razvoj Cazin“ doo, JU „Kulturni Centar“, JKP „Čistoća“ doo, uz profesionalni nadzor predstavnika Zavoda za zaštitu kulturnih spomenika, restauratora i konzervatora gospodina Mirzeta Mujadžića, dok je općina Cazin bila pokrovitelj.



Volonteri su u prvom redu uključivali direktore i predsjednike inicijatora, savjetnika načelnika, članove savjeta drugih mjesnih zajednica kao što su Majetići i Gnjilavac i mlade iz Stijene, Prošića, Cazina, Čoralića, Ostrožca i drugih, u starosnoj dobi od 12 do 60 godina, različite obrazovne strukture.

Akcija koja je trajala od 10:00 do 17:00 h, kako je i bilo planirano, polučila je velike rezultate. Najvažniji od njih su druženje i upoznavanje sa novim ljudima, širenje pozitivne energije i zajedničkog zalaganja, kroz inspiraciju kojoj se prisutni nisu mogli oteti. S druge strane, prednji dio Starog grada Ostrožac je toliko očišćen da se vidno primijeti razlika. Nekad se moglo vidjeti samo zelenilo, sve je bilo obraslo u drveću i šiblju, a sad se jasno vide zidine utvrde sa istaknutom kulom, uklesanom zmijom i nekolicinom tajanstvenih otvora, za koje malo ko ima objašnjenje čemu su služili i kuda vode.

Uređena je i središnja staza koja je bila zarasla travom, te su pojedini zidovi očišćeni od bršljena, jednog od najvećih neprijatelja zidina Starog grada Ostrožac.

Predstavnik projekta pod nazivom „Preporod doline Une“, Amedeo Amati, kazao je nekoliko riječi o projektu koji se provodi na području USK-a, i na takav način doprinio razgovoru o turističkom potencijalu i prilikama lokalnog stanovništva.

Vrijednim volonterima i njihovim inicijatorima pridružio se i načelnik općine Nermin Ogršević. Podržao je akciju i njene višestruke koristi. Pridružio se zajedničkom zaključku da je urađen veliki posao, ali da je on tek i počeo. „Ovakvim projektima i akcijama dajemo do znanja da nam je stalo, da želimo ulagati trud u našu zajednicu, prije svega u okoliš i vrijedne spomenike kojima je naša teritorija jako bogata. Smatram da su rezultati akcije zaista nemjerljivi, u materijalnom, kulturnom, turističkom i društvenom smislu“, rekao je načelnik u razgovoru sa aktivnim građanima naše općine.

Ista akcija ponovljena je 24. juna, dvije sedmice kasnije. Rezultat rada učesnika ovih dobrotvornih, humanih i nadasve prijateljskih akcija oličen je u neprepoznatljivoj slici Starog grada Ostrožac i njegovih historijskih obilježja, koja su se dugo vremena krila iza bršljena, trave, stabala i žbunja. Sada su svi posjetioci, prolaznici, turisti, kao i domaće stanovništvo oduševljeni prizorom i novim dijelovima grada koji do tada nisu imali priliku vidjeti.



Posjeta Načelnika

Otpočeo proces izgradnje glavnog kanalizacionog sistema općine Cazin

Zvanično je projekat izgradnje glavnog kanalizacionog sistema općine Cazin počeo sastankom između načelnika općine Cazin, gospodina Nermina Ogrševića, nosioca izrade studije izvodljivosti projekta, konsultanata kompanije Holinger iz Švicarske, njihovih lokalnih partnera u firmi Una Consulting iz Bihaća i Enovom iz Sarajeva.

Odabir konsultanata vršila je Evropska banka za obnovu i razvoj EBRD preko koje će se implementirati bespovratna sredstva Investicijskog okvira za zapadni Balkan (Western Balkans Investment Framework – “WBIF”) koja su dodijeljena općini Cazin u iznosu od 700.000,00 eura.

Sredstvima WBIF finansiraće se Studija izvodljivosti u vrijednosti od 300.000,00 eura te priprema glavnog (izvedbenog) projekta za tendersku dokumentaciju za prioritetne komponente koje su predložene Studijom izvodljivosti (do 400.000,00 eura).

Rok za izradu studije izvodljivosti je 3 mjeseca i ista je potrebna da bi EBRD i drugi donatori utvrdili izvodljivost Projekta s tehničkog, finansijskog, okolišnog i socijalnog aspekta i potvrdili njegovu podobnost za finansiranje sredstvima iz granta, nakon čega je izvjesno i potpisivanje sporazuma sa finansijerima i donatorima te početak izgradnje glavnog kanalizacionog sistema.



Radna atmosfera

Prethodne godine je na osnovu aplikacije Općine Cazin, Vlada Holandije odobrila sufinansiranje Projekta grantom iz svog ORIO programa u iznosu od 3,5 miliona eura. Također, interes za sufinansiranje Projekta grantom u iznosu od oko 2 miliona eura je iskazala i Švedska agencija za međunarodni razvoj (Swedish International Development Cooperation – „SIDA“), a u toku su i razgovori s Delegacijom Evropske unije (EU) u Sarajevu za dodatni grant za sufinansiranje u iznosu od 2 miliona eura iz sredstava državnog IPA programa (Instrument for Pre-Accession Assistance – Instrument predpristupne pomoći).



Učesnici projekta



Općina Cazin pokrenula **Servis 48h**

Protokol o saradnji u radu servisa 48 sati, koji realizira Općina Cazin, kao dio Projekta upravne odgovornosti (GAP), potpisan je u kabinetu općinskog načelnika 30. maja 2012. godine. Potpisnici Protokola pored Općine Cazin su i JKP „Čistoća“, JKP „Vodovod“ i JU „Komunalno-stambeni fond“. Svrha ovog sistema jeste brza povratna informacija za svakoga ko podnese zahtjev, upit, prijavi problem ili nešto slično iz komunalne oblasti.

Opći cilj ovog servisa jeste unapređenje općinskih kapaciteta upravljanja i razvoja komunalnih usluga, efikasnije rješavanje zahtjeva korisnika usluga, koordinacija između Općine i komunalnih preduzeća, poboljšanje rada davaoca usluga itd. Najvažnije u cijelom ovom procesu jeste povećanje stepena zadovoljstva građana kao korisnika, zbog čega je Općina i prihvatila ovaj projekat.

Od danas se svim građanima, privrednicima, investitorima i drugim korisnicima pruža mogućnost da pomoću ovog servisa prijave komunalni problem i dobiju povratni odgovor, informaciju ili obavijest o statusu rješavanja zahtjeva, najkasnije u roku od 48 sati.

Obrazac Zahtjeva koji se koristi u ove svrhe, osim u Centru za pružanje usluga građanima, dostupan je i on-line na službenoj web stranici općine: www.opcinacazin.ba. Prilikom slanja zahtjeva, korisnik usluge ujedno bira i način za dobijanje povratne informacije. Adresirane zahtjeve, pitanja, primjedbe i sl. nadležni službenik Općine će prosljeđivati komunalnim preduzećima, čiji je rok za dostavljanje odgovora 36 h, kako bi Općina svoju informaciju mogla kompletirati u roku od 48 h.

Glavni potpisnik ovog Protokola, općinski načelnik Nermin Ogršević, ističe veliku važnost što se Općina uključila u ovaj sistem kao jedna od prvih u BiH. „Time zapravo demonstriramo želju za vlastitim unapređenjima, jer samo na takav način možemo ponuditi usluge kojima će naši građani biti zadovoljni. Ovo zaista radimo iz tih razloga i pokazaće se koliko je ko u sistemu odgovoran, ažuran i predano radi svoj posao“, istaknuo je načelnik u svojoj izjavi za medije.

Potpisivanje protokola



Polaznici akademije



Predavač Sabahudin Huskić

II ciklus Akademije za građane

Općina Cazin je i ove godine uspješno realizirala projekat „Akademije za građane“. U okviru novog ciklusa Akademije prijavljenih je bilo 42 polaznika, od kojih je 37 uspješno završilo ove svojevrsne treninge. Cilj projekta jeste povezivanja građana i lokalne administracije, kroz predavanja putem kojih su se učesnici upoznali sa radom općine, javnih preduzeća, ustanova, nevladinog sektora i sl. Prošle godine općina Cazin je bila jedna od 7 učesnica ovog pilot projekta, a već ove godine realizirala ga je kao svoju obaveznu aktivnost ugrađenu u Strategiju komuniciranja, kao jedan od vidova saradnje i razmjene informacija sa građanima.

„Moramo biti svjesni da smo društvo u procesu promjena, prilagođavanja novim standardima, tranziciji i da do novih uspjeha ne možemo doći preko noći. Najveći preduslov svega toga jeste da mijenjamo sami sebe. Naš interes je da imamo bolju komunikaciju sa građanima, jer ćemo se na takav način bolje razumjevati i izbjegavati eventualne nesporazume“, rekao je načelnik Ogršević povodom uspješno završene Akademije. On smatra da ovakve projekte treba provoditi kontinuirano i da ih treba približiti većem broju stanovnika naše općine, jer mogu olakšati rad općinskog organa uprave i ujedno zadovoljiti građane kao korisnike usluga.

Predavanja su se odvijala svakog ponedjeljka u večernjem terminu, prema dogovoru sa samim polaznicima. Tematika je bila ista kao u prethodnom ciklusu Akademije, sa novim primjerima iz prakse, nekim novim predavačima i većim brojem riješenih dilema ovogodišnjih polaznika.

Kako je pojasnila predstavница Ureda OSCE-a u Bihaću, gospođa Azrija Pirić, ovo je jedinstven projekat u jugoistočnoj Evropi. Nastao je u Americi i tamo se uspješno realizira već dugi niz godina. „Ono što je bit Akademije leži u činjenici da svaki građanin bez obzira na političko, vjersko, nacionalno ili neko drugo opredjeljenje, ima pravo da učestvuje u predavanjima, da se upozna sa radom lokalne zajednice i da sam doprinese identifikaciji problema neophodnih za rješavanje u svom okruženju“, riječi su gospođe Pirić.

Budući da je Akademija za građane postala sastavni dio Strategije komuniciranja Općine Cazin, ista će se organizirati svake godine sa unaprijed najavljenim terminima prijave i održavanja.



Općina Cazin je uspješno realizirala emisiju obveznica u iznosu od 1.000.000,00 KM iz kojih će se financirati rješavanje imovinsko-pravnih odnosa i uređenje infrastrukture prve faze razvoja poslovne zone „Ratkovac“.

Općina se od početka projekta odlučila na ovaj vid finansiranja, koji u odnosu na finansiranje putem kredita ima povoljnije uslove u pogledu niže kamatne stope, te njezine nepromjenjivosti, a otvorena je i mogućnost sekundarnog trgovanja obveznicama putem berze.

Investitori koji su uložili u obveznice općine Cazin su: Sparkasse bank d.d. Sarajevo, UNION banka d.d. Sarajevo, UNIQA osiguranje d.d. Sarajevo, ZIF CROBIH d.d. Mostar, Croatia osiguranje d.d. Ljubuški, ZIF sa javnom ponudom „prevent INVEST“, OIF HYPO BH EQUITY d.o.o. Sarajevo. Ulaganjem sredstava

u obveznice općine Cazin navedeni investitori su pokazali povjerenje u uspješnost projekta razvoja poslovne zone Ratkovac, ali i uvjerenje u finansijsku stabilnost općine Cazin, koja će obaveze po osnovu emisije obveznica izmiriti u roku od pet godina.

Općina Cazin pokrenula je inicijativu za osnivanje poslovne zone kako bi direktno podstakla razvoj malog i srednjeg preduzetništva, te obrtništva na području općine. Osnovna namjera osnivanja i razvoja poslovne zone na području općine Cazin jest podsticanje preduzetništva kao pokretačke snage lokalnog i regionalnog održivog privrednog razvoja, s ciljem povećanja broja privrednih subjekata na području općine, poboljšanja njihovih poslovnih rezultata, povećanja konkurentnosti, porasta zaposlenosti, te povećanja udjela proizvodnje u ukupnoj privredi općine Cazin.



Poslovna zona Ratkovac

Osnovni srednjoročni ciljevi projekta u roku od 5 godina su:

- Povećanje broja malih i srednjih preduzeća za 4%,
- Povećanje udjela proizvodnje u ukupnoj privrednoj aktivnosti općine Cazin za 15%,
- Povećanje izvoza za 20%,
- Otvaranje novih 1.500 radnih mjesta u zoni sa indirektnim efektom na još 3.000 radnih mjesta izvan zone.

uspješno realizirali projekat

UMZ Čizmići je u jednoj svečanoj atmosferi priveden kraju projekat „Za aktivne mještane zajednice“, koji je realiziran u saradnji sa Fondacijom Mozaik, a podržan od strane EU.

Ovom prilikom u cjelosti je prezentiran projekat, ukupne vrijednosti 8.886,14 KM, od čega je Fondacija Mozaik finansirala 6.856,14 KM, a MZ-a 2.030,00 KM. Prema ranije potpisanom Memorandumu, Općina Cazin je udio Fondacije sufinansirala u iznosu od 1.500,00 KM. U okviru projekta opremljen je društveni prostor sa osnovnim namještajem (stolice i stolovi), LCD televizorom te stolom za bilijar. Posebna vrijednost za projekat jesu volonterski sati, kojih je na kraju bilo 1.096, što je uz učešće mladih i žena bio jedan od osnovnih ciljeva realiziranog projekta.

Čelni čovjek naše lokalne zajednice, načelnik Ogrješević, čestitao je MZ Čizmići i njenim mještanima na uspjehu koji su ostvarili i saradnji koju su imali sa Fondacijom. On je također dodao da su Čizmići, zajedno sa druge dvije MZ, bili vrlo dobri predstavnici općine Cazin i ujedno ostvarili zavidne rezultate. „Pored ovog materijalnog dijela, koji se odnosi na uređenje društvenog doma, predstavnici MZ su prošli i određenu edukaciju za izradu projekata, strateškog planiranja i sl. Mislim da je to jedan veliki napredak, jer su stečeni uslovi da u narednom periodu samostalno pripremaju određene pro-



Prostorije Doma

jekte i apliciraju prema fondovima i objavljenim konkursima. Nadam se da će i predstavnici Mozaika pozitivno ocijeniti ovu našu saradnju i da ćemo biti prepoznati kao poželjan partner u budućim projektima. Kad je u pitanju ovaj Društveni dom, trebate biti jako zadovoljni, jer mislim da u ovom trenutku imate najbolje uslove za rad svih struktura, od omladine do najstarijih, pa i invalidnih lica, odnosno imate multifunkcionalan prostor koji se može koristiti za razne stvari i aktivnosti, što naravno zavisi i od vaše kreativnosti. Nadamo se da će ovaj prostor biti mjesto interakcije svih mještanina i da će vaša druženja rezultirati novim idejama i projektima“, rekao je načelnik Ogrješević.

Ispred Fondacije Mozaik, Eni Kurtović, menadžerica projekta, zahvalila se Općini Cazin na velikoj podršci i uspješnoj saradnji i poželjela svako dobro mještanima MZ Čizmići i njihovim predstavnicima.

Salih Mujadžić, predsjednik Savjeta ove MZ, nije krio zadovoljstvo rezultatima projekta. Zahvalio se svima koju su učestvovali u njegovoj realizaciji i napomenuo da su u okviru strateškog planiranja, koje su prošli pripremajući projekat, definisali i važan datum za ovu MZ, a to je Dan MZ Čizmići, koji će se od sada obilježavati 10. jula, na datum kada se i osnovala ova MZ.



Partneri u projektu

Brdska trka dovela prijatelje iz Italije i Španije

Cazin je posljednjeg vikenda u junu bio poprište sportskih, zabavnih i poslovnih susreta. U nedjelju, nakon brdske trke Cazin 2012, načelnik općine Cazin je ugovorio prijatelje iz Španije i Italije, gospodu Rubena Espina, direktora španske kompanije Sun Red i dr. Roberta Cavallara, konsultanta za međunarodno pravo i savjetnika počasnog konzula BiH u Italiji i njegovog radnog kolegu Sanela Liđana.

S obzirom da je kontakt sa gostima iz Španije i Italije uspostavljen ranije, ovo je bila prilika da se razgovara i o mogućim vidovima daljeg razvoja saradnje, kako u oblasti automobilizma, tako i u mnogim privrednim segmentima. „Naša firma je samo jedan od pozitivnih primjera poduzetničkog duha i ta iskustva želimo prenijeti i podijeliti sa prijateljima u Cazinu. Jako nam je drago što smo ovdje i nadamo se skorom povratku“, riječi su gospodina Rubena.

Sa druge strane dr. Roberto Cavallaro je već nekoliko puta boravio na ovim prostorima i



Na prijemu u kabinetu

osvjedočeni je prijatelj Bosne i Hercegovine. On smatra da se radi o jednom povoljnom poslovnom ambijentu, zbog čega se stalno vraćaju na ovo područje.

Načelnik Ogršević je uz dobrodošlicu gostima ukratko predstavio općinu Cazin. „Raduju nas pozitivni komentari gostiju i učesnika da je staza za ovogodišnju trku kvalitetno pripremljena, da je sigurno spremna i za viši rang takmičenja, odnosno evropsko prvenstvo. Na temelju ove manifestacije mogu se graditi kontakti na osnovu kojih možemo razmišljati i o određenim razvojnim programima i projektima. Današnji susret ide u pravcu definisanja okvira moguće dalje saradnje“, rekao je, između ostalog, općinski načelnik.

Gosti iz Italije i Španije su pored prisustva na brdskoj utrci iskoristili priliku i za obilazak starih gradova, u centru Cazina i na Ostrožcu.



Kod Berkovog dvorca

Razmjena iskustava između prijateljskih općina Cazin i Livno

Sve češće u našu općinu svraćaju prijatelji iz drugih lokalnih zajednica širim BiH. Ponekad zbog određenih događaja, ponekad zbog sportskih i kulturnih manifestacija, a ponajviše kako bi razmijenili iskustva u oblasti pripreme projektnih projekata i upravljanja projektima. Tako je u posjetu općini Cazin stigla i delegacija općine Livno, s ciljem razmjene iskustava koja se tiču trezorskog poslovanja. Posjeta je ostvarena putom predstavnika GAP projekta koji su pružali tehničku podršku prilikom uvođenja ovakvog načina poslovanja. Savez općina i gradova je zajedno sa Projektom upravne odgovornosti GAP izradio Vodič o trezoru koji je dostavljen svim članicama Saveza općina i gradova kako bi oni na najlakši mogući način počeli primjenjivati Zakon o trezoru. Kako je pojasnio načelnik Ogršević, općina Cazin je prva na USK počela primjenjivati trezorko poslovanje, tačnije od 01.01.2012. godine.

„Iznimno mi je drago da možemo biti primjer drugima u raznim sektorima našeg poslovanja i prenijeti svoja iskustva našim prijateljima u drugim općinama. Danas su s nama predstavnici općine Livno, kojima ćemo pružiti sve potrebne informacije i olakšati posao u ovoj oblasti“, dodao je načelnik Nermin Ogršević.

Višnja Perković, viši samostalni referent za proračun u općini Livno, istaknula je slijedeće: „Prije svega se zahvaljujem ljudima iz Općine koji su nas ovako lijepo primili, a razlog naše posjete je uvođenje trezorskog poslovanja u općini Livno. S uvođenjem trezorskog poslovanja počeli smo u 2011. godini, ali nismo uspjeli u potpunosti to riješiti zbog cjelokupne proce-

dure. Nakon toga smo u 2012. godini počeli sa informatičkim uvođenjem naših korisnika u knjigu. S obzirom da općina Cazin ima dosta sličnosti sa općinom Livno, a na prijedlog GAP koordinatora za općinu Livno, gospođe Merdže Handalić, mi smo došli ovdje po detaljnije informacije i iskustva iz prakse u vezi sa trezorskim poslovanjem.“



Radni sastanak



Razmjena iskustava

Općine Tešanj i Cazin razmjenjuju iskustva

U ponedjeljak 2.07.2012. godine u posjeti općini Cazin boravio je Direktor Agencije za razvoj općine Tešanj, gospodin Hilmo Perčo sa saradnicima. Agencija ispred općine Tešanj priprema projektnu aplikaciju izrade kanalizacijskog sistema za općinu Tešanj sa uređajem za prečišćavanje na program ORIO, pa je cilj njihove posjete bio upoznati se sa iskustvima općine Cazin, kojoj su odobrena grant sredstva kroz ORIO program i Zapadno balkanski investicijski okvir (WBIF) u ukupnom iznosu od 4,3 miliona eura. ORIO program je podrška Holandske vlade zemljama u razvoju sa ciljem razvoja infrastrukture i promociju unapređenja životnih uslova i razvoja privatnog sektora.

Predstavnici općine Cazin su gostima prezentovali sve procese kroz koje je potrebno proći do konačnog odobrenja grant sredstava ORIO programa.

Prema onome što je rekao načelnik Ogršević, uspješnost općine Cazin u planiranju, projektiranju i apliciranju projekata je rezultat rada tima ljudi, koji su vrijedni, kvalificirani i sposobni.

„Danas imamo kompetentne ljude koji su sposobni odgovoriti izazovima ubrzanih razvojnih promjena i zbog kojih je porastao rejting naše općine u domaćim i međunarodnim krugovima“, smatra načelnik Ogršević.

Direktor Agencije, gospodin Hilmo Perčo, zahvalio se načelniku općine Cazin i njegovim saradnicima na korisnim informacijama i gostoprimstvu i ponudio saradnju i partnerstvo općine Tešanj na mogućim projektima EU programa iz svih oblasti. Nakon sastanka gosti su u pratnji predstavnika općine Cazin obišli i Stari grad Ostrožac gdje su razgovarali o trenutnim i planskim aktivnostima općine Cazin za uvrštavanje Starog grada Ostrošca u regionalnu turističku ponudu.



Radni sastanak

Zagrebački studenti Filozofskog fakulteta posjetili Cazin



Krajem maja tekuće godine u posjeti Czinu sa svojim profesorima boravila je grupa studenata Filozofskog fakulteta iz Zagreba, sa odsjeka povijesti. Namjeru o posjeti su najavili prije nekoliko dana, tražeći dostupnost Starom gradu Ostrožac, ali općinski načelnik im je uputio i poziv za posjetu samom centru grada i znamenitostima koje se nalaze u Czinu. Kraću stanku uz predstavljanje Czinu gosti su imali u Vijećnici, gdje ima je dobrodošlicu izrazio općinski načelnik Nermin Ogršević.

„Drago mi je da ste došli u Czin. Ovo je dobra prilika da se bolje upoznamo i da podijelimo informacije sa Vama, kao nama dragim susjedima i nadasve prijateljima. Ovo područje obiluje kulturnim i historijskim znamenitostima, koja su predmet Vašeg interesovanja pa se nadam da ćete uživati u obilascima koje ste planirali“, rekao je načelnik svojim gostima.

Nakon osvježena gosti su u pratnji Bahrudina Beširevića, profesora historije, obišli Staru medresu i

Stari grad sa džamijom. Potom je uslijedila posjeta Starom gradu Ostrožac, što je bio i osnovni cilj njihovog dolaska u Czin. Iako neplanirano, u okrilju ovog velikog i jedinstvenog zdanja ostali su malo duže, zbog duge i bogate historije ovog grada, o kojoj su htjeli saznati što više informacija. Prema riječima studenata, u Czinu su osjetili veliku dobrodošlicu, prijatne ljude i vidjeli prelijepe kulturne i historijske spomenike.

Voditelj ove mini ekskurzije i profesor na Filozofskom fakultetu, Nenad Maočanin, ističe veliku zahvalnost zbog gostoprimstva i nada se ponovnom dolasku zbog zanimljivih ostavština iz perioda turske vladavine. „Povod ovom posjeti je redovna terenska nastava studenata povijesti. Ja i mojih dvoje mlađih kolega smo turkolozi i orijentalisti pa smo našli za shodno posjetiti ovo pogranično područje i lično se uvjeriti u neke detalje iz perioda koji izučavamo. Imamo sreću što je s nama prof. dr. Machiel Kiel, najveći svjetski stručnjak za arhitekturu, fortifikacijsku i vjersku, iz tog perioda, pa smo uz njegovu pomoć vidjeli mnogo toga impresivnog, što je izazvalo veliku pažnju i zanimanje naših studenata, a to je u konačnici i bio osnovni cilj ovog putovanja“, rekao je profesor Maočanin.



Posjeta Ostrošcu

IX PAPRIKAŠIJADA

Zadnji majski vikend

Zadnji vikend mjeseca maja u Cazinu je obilježen IX Cazinskom paprikašijadom. Događaj je to koji postaje tradicija cazinske krajine, a posjećuju ga gosti susjednih općina pa čak i onih iz drugih zemalja. Mjesto održavanja Paprikašijade jeste izletišta Stovrela, a dugi niz godina ovu manifestaciju organizuje MZ Cazin pod pokroviteljstvom Općine.

U uvodnom dijelu manifestacije Predsjednik Savjeta MZ, ujedno predsjednik Organizacionog odbora za održavanje IX Paprikašijade, profesor Hamdija Ljubijankić, zahvalio se svim sponzorima i generalnom pokrovitelju. Posebnu zahvalnost uputio je volonterima koji nisu žalili ni truda ni vremena kako bi ovaj događaj ponio epitet najbolje organizovanog do sada.

Pored niza zanimljivosti, druženja i zabave, ova manifestacija ima i takmičarsku dimenziju. Cilj je svakako napraviti najbolji paprikaš, što je ove godine bilo izuzetno teško učiniti, s obzirom da

je bilo prijavljenih 38 ekipa. Članovi žirija u sastavu Hadžić Muhamed-Naser, Omanović Sulejman i Šakonjić Alija ocjenjivali su okus, izgled i strukturu pripremljenih jela. Nakon zbroja bodova, prvo mjesto osvojila je ekipa „Vijesti bez svijesti“, drugo mjesto ekipa koja je nosila naziv „Revita“, dok je treće mjesto pripalo MZ „Polje“.

MZ Cazin, kao domaćin događaja, nastojala je atmosferu učiniti veselom, interesantnom i nadasve interaktivnom. Ujedno su podijelili 600 porcija paprikaša i počastili goste pićem. Da bi takmičenje bilo zanimljivije, kao i ranije, proglašene su naj ekipe u kategorijama najbrojniji (Mrakovica), najveseliji (Limarija Beganović) i najuređeniji (Revita).

Događaju je po tradiciji prisustvovao i načelnik općine. Dodijelio je pehare najboljima i podijelio radost sa učesnicima zbog dobre atmosfere i zajedništva koje se pokazalo kao izuzetno dobar alat u promociji turističkih potencijala našeg kraja.

obilježen „Paprikašijadom“



Povlačenje konopca



Rekordan broj posjetioca

U zabavnom dijelu pripremljenog programa održana su takmičenja u povlačenju konopca i trčanje u vrećama. Prva mjesta su pripala ekipama „Limarija Beganović“ i AMK „Extrasport“. Muzikom i plesom prisutne su zabavljali članovi KUD Hasan Mujezinović, cazinski bend „Hari, Đuma i Besko“, a nastupili su i mladi muzičari grupe „Stairways“.

Lijepo vrijeme je izmamilo veliki broj građana iz njihovih kuća, a vijest o dobroj organizaciji se brzo širila pa je ove godine zabilježena i rekordna posjećenost Paprikašijade. Sve to je razlog više da se naredne godine ponovi ova priča, sa još više zanimljivih sadržaja, kvalitetnih paprikaša i još većim brojem prijavljenih ekipa.



Nagrađeni učesnici



38 paprikaša

Uzvratne posjete Cazinjana iz dijaspore



Na centralnom šehidskom spomeniku

Općinski načelnik Nermin Ogrješević u svom kabinetu je upriličio prijem za grupu omladine iz švicarskog grada Oberentfeldena, na čelu sa dr. Murisom ef. Purićem, glavnim imamom u Švicarskoj. Među gostima je bilo i nekoliko članova njihovog džemata, koji su na neki način i domaćini, s obzirom da su inače sa ovih prostora. „Obradovani smo ovom posjetom. Zaista nam je drago da imamo priliku uzvratiti gostoprimstvo koje svaki put osjetimo kad budemo gosti džematu i uopće tom području Švicarske, a s druge strane, drago nam je da imamo priliku ugostiti našu omladinu i cazinsku i bosansku, koja odrasta u Švicarskoj i koja se kroz ove aktivnosti ustvari bori da očuva svoju tradiciju, vjeru, kulturu, da pojača svoje veze sa domovinom i slično. Dakle, naš cilj je, kao što ističemo svaki put, da budemo od pomoći, da našu dijasporu, naše najmlađe sugrađane u dijaspori, čvrsto vezemo za BiH, čvrsto vezemo za Cazin, jer nam je jednostavno bitan svaki čovjek“, rekao je načelnik Ogrješević svojim gostima.

Gosti iz Švicarske

Efendija Purić se zahvalio domaćinima i objasnio važnost uzajamnog posjećivanja, druženja i obilaska teritorije sa kojom ih vežu mnoge zajedničke karakteristike, posebno one vjerske. Poručio je svim Cazinjanima u dijaspori da posjete svoju domovinu i da svoju djecu na odmore dovode u ove krajeve.

„Smatram da ovakve i slične ekskurzije mogu biti dvosmjerne ulice prijateljstva između građana našeg Cazina i naših sugrađana bilo gdje u Evropi. Djeca trebaju da se druže, da znaju odakle njihovi roditelji dolaze i da njeguju svoje rodbinske veze“, rekao je dr. Purić.



Međuopćinska razmjena iskustava

Cazina i Viteza



Gosti iz Viteza

Utorak, 10.07.2012. godine, u službenoj posjeti općini Cazin boravili su predstavnici općine Vitez, Muhamed Rebihić, Pomoćnik načelnika za poduzetništvo i lokalni razvoj, Ismet Trako, Viši stručni saradnik za razvoj i Armin Varupa, Stručni saradnik za projekte. Cilj sastanka sa predstavnicima općine Cazin i direktorom cazinske Agencije za razvoj bila je razmjena iskustava u pronalaženju sredstava za finansiranje infrastrukturnih projekata, sa fokusom na projekat izgradnje kanalizacije i donatorske izvore iz kojih je općina Cazin dobila podršku: ORIO program i Zapadno balkanski investicijski okvir (WBIF). Savjetnik načelnika Suad Rošić u vezi održanog sastanka istaknuo je slijedeće: „Potrebe razvoja svake lokalne zajednice proizilaze iz stvarnih potreba građana za unapređenjem kvalitete života u sva tri segmenta razvoja: ekonomskom, društvenom i okolinskom. Međutim, nivo razvoja prije svega je ograničen finansijskim mogućnostima, tako da zasigurno možemo reći da je jedan od najvećih izazova svake općine u Bosni i Hercegovini pronalaženje dodatnih izvora finansiranja putem apliciranja za dodjelu bespovratnih sredstava. Općina Cazin je zahvaljujući jačanju kadrovskih kapaciteta ostvarila značajne rezultate u procesu pripreme projektnih aplikacija i pribavljanju donatorskih sredstava, te smo pokazali i spremnost da vlastita iskustva podijelimo sa

svim općinama koje su za to zainteresirane. Do sada su takav interes kroz direktnu posjetu općini Cazin pokazale općine: Doboj Jug, Gradačac, Tešanj i Vitez, kao i neke druge općine putem drugih oblika komunikacije.“

Direktor ARC-a, gospodin Amir Mulalić je prezentirao projekat uspostavljanja poslovne zone „Ratkovac“ u Cazinu nakon čega je Pomoćnik načelnika za poduzetništvo i lokalni razvoj općine Vitez gospodin Muhamed Rebihić govorio o iskustvima općine Vitez, općine sa sigurno velikim brojem zaposlenih. Istaknuto zadovoljstvo radi korisnosti sastanka nije izostalo, a svi su se složili da ova saradnja oko razmjene iskustava tek počinje.



U službi za urbanizam

Dan policije USK u Cazinu

Na Trgu prvog predsjednika Predsjedništva R BiH Alije Izetbegovića održana je centralna svečanost povodom obilježavanja Dana policije USK-a, koja je počela svečanim postrojanjem pripadnika kantonalnog i federalnog MUP-a, te pripadnika Agencije za istrage i zaštitu.



Nakon toga Jedinica za podršku MUP-a USK izvela je pokaznu vježbu na kružnom toku u centru grada, a tokom cijele manifestacije građani su bili u prilici da razgledaju izložen dio opreme sa kojom raspolažu pripadnici naših organa sigurnosti i zaštite.

U Kulturnom centru je nastavljena svečana akademija kojoj su prisustvovali i svoje poruke povodom Dana policije USK-a uputili federalni ministar policije Predrag Kurteš, direktor FUP-a Dragan Lukač, premijer USK-a Hamdija Lipovača, ministar unutrašnjih poslova USK-a Šefik Smlatić, te predsjedavajući Skupštine USK-a Admir Hadžipašić i načelnik općine Cazin Nermin Ogrješević.

U obraćanjima je upućena jasna poruka da je MUP spreman i opremljen da odgovori svim zahtjevima i izazovima vremena u kojem živimo.

Obraćajući se prisutnim gostima i kao domaćin izražavajući toplu dobrodošlicu u Cazin, načelnik Ogrješević je naglasio:

“Ovo je također prilika da se sjetimo pripadnika MUP-a koji su dali svoje živote u odbrani naše domovine. O ulozi i značaju policije čuli smo mnogo od ljudi koji se nalaze u tom poslu, a ja kao načelnik općine, u ime lokalne zajednice, dajem punu podršku policiji. Želim da se nastavi razvijati u smislu dobrog funkcioniranja kako na našem Kantonu, tako i na području cijele BiH, osiguravajući bolju sredinu za život“.

Ova manifestacija je iskorištena i za dodjelu nagrada i priznanja za najbolje i najuspješnije pripadnike kantonalnog MUP-a, kao i priznanja i zahvalnice za doprinos u radu MUP-a USK.



Uključiti djecu sa Down sindromom u svijet koji ih okružuje

Općina Cazin i njeni predstavnici i ove godine su na prigodan način obilježili Svjetski dan Down sindroma. S obzirom da je ranija praksa bila druženje sa djecom u njihovoj školi ili prostorijama udruženja „I naša djeca su djeca“, ovaj put je njima pružena prilika da posjete općinu i općinskog načelnika.

Voditelji udruženja i roditelji djece iskoristili su priliku da porazgovaraju sa načelnikom o trenutnim aktivnostima udruženja i planovima za naredni period. Fadila Japić, ispred Udruženja, naglašava važnost uključivanja djece sa Down sindromom u svakodnevni život svijeta koji ih okružuje. „U tu svrhu nam svakako pomaže i ova posjeta Općini i prostorijama kabineta načelnika. Djeca su oduševljena i vjerovatno će im ovo druženje predstavljati posebnu uspomenu“, pojasnila je gospođa Japić.

Načelnik je svojim gostima podijelio poklone za sjećanje na ovaj dan i druženje sa uposlenicima organa uprave. Istaknuo je važnost svakodnevnih pažnje na potrebe ove populacije naših stanovnika.

„Naša je obaveza da se brinemo za ovu djecu, ali istodobno i naša velika radost. Djeca donose najbolje u živote svih nas i zbog toga im treba posvetiti posebnu pažnju. Općina daje podršku aktivnostima Udruženja i zahvaljuje se svima koji su uključeni u rad sa ovom djecom, da li volonterski ili profesionalno. Ovo druženje također ima svrhu skrenuti pažnju javnosti da pokaže više humanosti i da zajedno obezbijedimo bolji ambijent za djecu sa Down sindromom“, rekao je načelnik Ogrješević.



Djeca sa načelnikom

Da bi ovaj dan djeci učinili posebnima, uposlenici organa uprave su ih ugostili, pokazali im prostorije općine i kabineta i omogućili im da na trenutak obavljaju dužnosti načelnika općine.



Roditelji i djeca



U Cazinu obilježeno 20 godina zločina počinjenih na prostoru Prijedora

Cijeneci važnost zločina koji su se dogodili u Prijedoru, Općina Cazin u saradnji sa Udruženjem "Život" iz Bihaća, te udruženjima koja predstavljaju žrtve genocida iz Prijedora odlučili su da se jedan dio dvadesetogodišnjeg obilježavanja prijedorskog genocida održi u Cazinu pa su u Kulturnom centru Cazin organizirali javnu tribinu pod nazivom "20 godina zločina u Prijedoru". Javnoj tribini prethodilo je "Sjećanje na žrtve", u okviru kojeg su ispred stare zgrade Gimnazije u Cazinu, na gradskom trgu položili 266 ekshumacijskih vreća, od čega se 256 simbolizuje broj ubijenih žena, a 10 se odnosi na 10 djevojčica koje su isto stradale u zločinima u Prijedoru. Tribini, koju je vodio prof. Horozović Nazif prisustvovali su i brojni građani naše općine koji su imali priliku da iz prve ruke čuju šta se sve dešavalo u prijedorskim logorima i šire.



Predsjedavajući OV-a Cazin je u svom obraćanju istaknuo: "Mi kao Bošnjaci ne smijemo zaboravljati ovakve strahote koje su nas zadesile, iako se nalazimo u turbulentnim vremenima. Mnogima naredni mjeseci predstavljaju nešto lijepo pošto dolazi ljeto, ali mnogim našim Bošnjacima naredni period predstavlja crne dane koji se ne zaboravljaju, dane kada se prisjećaju stradanja i genocida. Oni koji su preživjeli torture naredni period ne dočekuju s veseljem, već s tugom i prisjećanjem na najdraže." Kao gosti i promotori ovog dijela obilježavanja 20 godina genocida u Prijedoru bili su i Sudbin Musić, predstavnik Udruženja logoraša Prijedor 92 i dr. Mujo Begić, šef bihaćkog Odjela In-

stituta za traženje nestalih BiH. Sudbin Musić, koji je ujedno i žrtva genocida, kroz svoju prezentaciju opisao je sve strahote koje su zadesile Bošnjake i Hrvate u Prijedoru u ratnom periodu, počev od logora smrti koji su odmah osnivani, pa sve do današnjeg negiranja genocida od mnogih političara iz RS. Također, gospodin Musić je izrazio nezadovoljstvo radom Suda BiH kao i radom vlasti i policije u Prijedoru, jer isti u dosadašnjem periodu nisu pomogli da se pronađe niti jedna nestala osoba.



Tribina u kulturnom centru

Dr. Mujo Begić dotaknuo se teme negiranja genocida kako u Srebrenici tako i na ovim prostorima. On smatra da se negiranjem stravičnih zločina stvaraju preduslovi za ponavljanje istih. Kroz svoju prezentaciju najviše se posvetio definiciji genocida, kao i njenim elementima, mentalnim i fizičkim. Podsjetio je da se među nestalim osobama nalazi i jedan Cazinjanin, Rekić Smail, također žrtva genocida koji je počinjen na ovim prostorima.



Prezentacije

Obilježen 15. april, Dan Armije Republike BiH



Program obilježavanja 20-te godišnjice formiranja naše slavne Armije započeo je učenjem Fatihe i minutom šutnje za sve njene poginule pripadnike, nakon čega je položeno cvijeće ispred spomen obilježja na stadionu FK Krajine. Članovima porodica poginulih boraca, šehidskih porodica, ratnim vojnim invalidima, demobilisanim borcima, predstavnicima izvršne i zakonodavne vlasti na svim nivoima i ostalim gostima obratili su se Jasmin Nadarević predsjednik JOB "Unija veterana", profesor Bahrudin Beširević, te ratni vojni komadanti Muhamed Hamdo Delalić i Ibrahim Nadarević, kao i načelnik općine Cazin Nermin Ogršević.

U svojim obraćanjima istaknuli su značaj obilježavanja Dana Armije BiH i svega onog što se s tim povezuje, počev od najranije historije Bosne i Hercegovine pa do danas. Također su naglasili da se ne smije zaboraviti zalaganje i hrabrost koju su pokazali svi borci i cjelokupno stanovništvo Bosne i Hercegovine u toku agresorske okupacije.

Prvi čovjek naše općine pozdravio je sve prisutne, izražavajući duboko poštovanje prema članovima porodica šehida, poginulih boraca, ratnim vojnim invalidima i demobilisanim borcima. Čestitao je 15. april, Dan Armije R BiH.

"Puno ljudi je dalo svoj doprinos u odbrani BiH, kako u pripremnom, tako i u organizacionim i funkcionalnim segmentima naših odbrambenih jedinica. Svi ljudi trebaju znati da su u toku agresije uradili značajnu stvar, da su bili izuzetno hrabri i da trebaju biti ponosni na tu činjenicu. Niko se ne treba osjećati zapostavljenim, jer je svaka organizaciona jedinica na svoj način učestvovala u odbrani naše domovine. Agresori su napravili planove koji su podrazumjevali da BiH kao država i Bošnjaci kao narod nestanu. Međutim, nisu računali na presudni faktor, a to je naša zajednička, hrabra i beskompromisna reakcija. Sprijekali smo ih u njihovim namjerama i zato danas imamo našu zajedničku domovinu Bosnu i Hercegovinu", rekao je načelnik Ogršević.

Ceremonija je nastavljena šetnjom do centralnog Šehidskog obilježja, gdje je također položeno cvijeće i proučena Fatiha.



Obilježena godišnjica Cazinske bune

U subotu, 05. maja, prigodnim je programom u cazinskom Kulturnom centru obilježena godišnjica Cazinske bune. Na samom početku prikazan je dokumentarac „Cazinska buna - neispričana priča“ u produkciji RTV Cazina, koji je nedavno snimljen na lokalitetima dešavanja Cazinske bune uz izjave svjedoka, učesnika i preživjelih osuđenika. Na neki način, vizualizacija dešavanja dojmila je prisutne, pored činjenice da je knjiga Vere Kržišnik Bukić sigurno temeljni izvor iz kojeg se crpe informacije o dešavanjima u toku Cazinske bune.



“Nakon 20 godina od izlaska Verine knjige nije se javio niko sa bilo kakvom novom činjenicom ili dokazom, koji bi oborili navode iznesene u ovoj knjizi, što govori o temeljitoj naučnoj vrijednosti djela. U toku je priprema drugog izdanja, kao i prijevod na engleski jezik, što će sigurno doprinijeti daljem rasvjetljavanju i širenju istine o Cazinskoj buni iz 1950. godine.”

Također je naglasio da se pored rasvjetljavanja događaja iz prošlosti moramo okrenuti budućnosti i zajedničkim snagama graditi bolje sutra za pokoljenja koja dolaze.

O djelu Vere Kržišnik Bukić govorio je i prof. dr. Senadin Lavić. On smatra da su ljudi svojim zalaganjem za rasvjetljavanje istine iz ovog perioda i aktualizacijom ovog pitanja pokazali dozu odgovornosti prema sebi i svom narodu. Zaključio je da autorica ima objektivan pristup analizi ovog pitanja i naglašava da je uspjela u svojoj namjeri.

Ovom prilikom prisutnima se obratio i predsjedavajući Skupštine USK-a Husein Rošić i N.J.E. Ambasador R. Slovenije u BiH Andrej Grasselli. „Kada govorimo o EU, često zaboravljamo na kojim temeljima je ona i osnovana, a to je bilo bitno i kod našeg odlučivanja o pristupanju EU. Riječ je o tome da je EU zajednica slobodnih ljudi, svaki čovjek ima pravo na slobodu i život vrijedan čovjeka,“ rekao je ambasador Grasselli, naglašavajući neupitnu podršku Slovenije Bosni i Hercegovini na njenom putu ka EU.



Ambasador Grasselli

Događaju je prisustvovala i autorica Vera Kržišnik Bukić. Primila je priznanje kojim se proglašava počasnom građankom naše općine shodno Odluci OV Cazin.

Prilikom svog obraćanja općinski načelnik je naglasio da njeno djelo za Cazin i događaje Cazinske bune ima poseban značaj.



Načelnik i Vera Kržišnik

Obilježeno formiranje Stijenske čete

UMZ Stijena obilježen je 7. april, Dan formiranja Stijenske čete. Manifestacija je ove godine nosila naziv „7.april - Dan formiranja čete TO MZ Stijena - Simbol priprema za odbranu od agresije na BiH“. Na svoju 20. godišnjicu dobila je posebnu dimenziju, jer je OV Cazin ovaj datum uvrstilo u Odluku o značajnim datumima Općine Cazin. Obilježavanje je počelo učenjem tevhida šehidima MZ Stijena, a sjećanje na ove bosanske velikane upotpunjeno je polaganjem cvijeća i učenjem fatihe na šehidskom obilježju. Na centralnoj manifestaciji kroz prigodne govore tekla su sjećanja na ratne dane i doprinos Stijene i njenih mještana odbrambeno-oslobodilačkoj borbi.

“Formiranjem ove čete mi smo dali konkretan odgovor prijetnjama koje su dolazile iz nacionalističkih, ekstremnih krugova i politika, koje su ustvari htjele silom zadržati Bosnu i Hercegovinu u ostatku krnje države, što nama kao narodu nije odgovaralo“, riječi su Mirsada Kaljkovića, predsjednika Savjeta MZ Stijena.

Pored doprinosa u zbrinjavanju velikog broja protjeranih Bošnjaka, skoro 3.000 Stijenjana je bilo mobilisano u jedinicama A RBiH, od čega je 139 ugašenih života, a više od dvije stotine njih zbog posljedica ranjavanja ima status RVI. Načelnik Ogršević je rekao da kroz obilježavanje značajnih datuma želimo da otrgnemo od zaborava našu odbrambeno-oslobodilačku borbu, ono što predstavlja temelj očuvanja naše zemlje.



Obraćanje Načelnika Ogrševića

“Posebno želimo da na mlađa pokoljenja prenesemo ove informacije, kako bi znali da je u državu koju danas imamo i slobodu koju uživamo uloženo puno života, sudbina i vjere u cjelovitost i suverenitet BiH. Plaćena je visoka cijena za našu bolju budućnost i to moramo znati cijeniti.”

U sklopu ove manifestacije održan je i turnir na stadionu NK Gomila, gdje su pored domaćina učesce uzele i ekipe iz Bužima i Kalesije. Manifestacija je završila zajedničkim druženjem uz vojnički ručak.



Polaganje vijenaca

Odreda za specijalna dejstva

Povodom dvadesete godišnjice od osnivanja Odreda za specijalna dejstva Petog korpusa Armije BiH, pripadnike ove slavne formacije na čelu sa njihovim komandantom Senadom Šarganovićem Šarganom u svom kabinetu primio je općinski načelnik Nermin Ogrješević. Bila je to prilika da se evociraju uspomene na mnoge događaje iz proteklog oslobodilačkog rata, ali i sjećanje na one koji danas nisu među nama, a omogućili su slobodu koju danas svi uživamo.

„Važno je napomenuti da su pripadnici ove formacije dolazili iz svih krajeva tadašnjeg bihačkog okruga, a iz Cazina su bila dva vođa“, pojasnio je Senad Šarganović. „Riječ je o borcima koji su pokazali veliku hrabrost i nesebično srce koje je kucalo za domovinu. To su borci koji su na svojim plećima iznijeli najznačajniji dio odbrane i borbe, skoro goloruki, ali časno i uz iznimno poštenje, izdržljivost i upornost, neviđeni patriotizam, uspjeli svojim tijelima sprječiti prodor prema Bihaću i drugim mjestima“, dodao je komandant Šargan.

Prema iznesenim podacima 46 pripadnika ovog odreda je poginulo, 130 lakše ili teže ranjeno, a dvojica boraca se vode nestalim. Zbog njih, ali i zbog potrebe da se historija ne zaboravi i nikad ne ponovi, upriličeno je obilježavanje dvadeset godina od osnivanja ovog odreda. Ove godine posjetili su mezarja pripadnika Odreda, svoje saborce i podsjetili javnost da su uvijek spremni braniti svoju domovinu.



Prema riječima Šemse Seferagića, pripadnika PDV „Munja“, koje je kasnije ušao u sastav Specijalnog odreda, to je bila jedan od najelitnijih jedinica.

“Ovaj datum za nas je značajan jer nam vraća emocije, prisjećamo se svega onog što smo prošli, ali je on daleko bitniji za generacije koje su stasale nakon rata, tj. za mlade ljude koji nisu zapamtili ništa od ratnih dejstava i rata. Mislim da bi ovaj datum trebao više da posluži kao putokaz, vraćanje historije u današnje vrijeme, kako bi mladi ljudi vidjeli kako se stvarala ova država, jer ona nije tek tako nastala. Za nju je proliveno dosta krvi i ugašeno mnogo života“, rekao je Šemso Seferagić.

Načelnik Nermin Ogrješević je podsjetio da općina Cazin kroz obilježavanje značajnih datuma daje svoj doprinos evociranju uspomena na odbrambeno-oslobodilačku borbu i dodao da je neupitna podrška i ovoj formaciji u nastojanjima da se otrgnu od zaborava svijetle činjenice naše bliske prošlosti. „Vrlo je značajno da vodimo računa o temeljima naše države, a sigurno je naša Armija sačuvala državu BiH i trebamo se prisjećati događaja koje obilježavamo kroz značajne datume u našoj općini. Važno je i da se sjećamo jedinica koje su djelovale u sastavu Petog korpusa i koje su dale svoj doprinos časnoj borbi i slavnom oslobođenju naše zemlje“, rekao je načelnik u razgovoru sa gostima.

Nakon prijema načelnik je zajedno sa gostima obišao centralno šehidsko obilježje, gdje je pročeta Fatiha za sve šehide BiH.



Na šehidsko m spomeniku

MZ Gornja Koprivna je prigodnim programom obilježila 19. godišnjicu pogibije majora Saliha Omerčevića, čime se evocira uspomena na ovog velikog sina BiH, ali i drugih šehida ove MZ-e.

Na samom početku velikom broju prisutnih mještana i gostiju među kojima su bili i ministar za boračka pitanja u Vladi USK-a Mirsad Topčagić, vijećnici OV-a Cazin i brojni drugi zvaničnici, obratio se općinski načelnik Nermin Ogrješević. „Vrlo je značajno da se sjećamo naše prošlosti, da razumijemo i znamo koji su naši temelji, jer jedino tako možemo graditi sutrašnjicu za nas, našu djecu i naredna pokoljenja. Naravno vrijeme u kojem živimo nosi neke nove izazove na koje moramo odgovoriti. Ja vjerujem da ćemo kao i u ratu biti dovoljno mudri, hrabri i jedinstveni i da ćemo istu formulu za uspjeh primijeniti i danas“, rekao je načelnik Ogrješević čestitajući domaćinima na organizaciji ove manifestacije.



Ovom prilikom je prikazan i dokumentaran film „Istina, sjećanje, zaborav“ mještana Jasmina Hadžića, koji je prisutne na kratko vratio u prošlost i podsjetio ih na teške ratne dane, ali i svijetle trenutke pobjeda, na heroje Armije BiH i na obavezu današnjih generacija prema tom vremenu i ljudima.

Obilježena godišnjica Vazduhoplovne grupe u Ćoralićima

Ove godine je cazinska MZ Ćoralići upriličila tradicionalno obilježavanje godišnjice Vazduhoplovne grupe Armije BiH. Ovoga puta bila je to jubilara 20-ta godišnjica. Tim povodom su predstavnici Vazduhoplovne grupe, kao i predstavnici općinskih i kantonalnih vlasti, položili cvijeće na spomen ploču i proučili fatihu, sjećajući se onih koji su dali svoje živote za našu domovinu.

U ime udruženja „Vazduhoplovna grupa“ Bihać prisutne je pozdravio i dobrodošlicu izrazio predsjednik istoimenog udruženja, penzionisani pukovnik Armije BiH Mirsad Fazlić, koji je podsjetio prisutne na doprinos ove formacije u odbrambeno oslobodilačkom ratu: „U maju '92. godine pri okružnom štabu TO Bihać formira se vazduhoplovno odjeljenje u koje se uključuju piloti i vazduhoplovni tehničari sa evidencijom općinskih štabova USK. Zadaci vazduhoplovnog odjeljenja bili su prikupljanje i angažovanje vazduhoplovnog kadra, uređenje letilišta na teritoriji općine Velika Kladuša i letilišta Ćoralići na teritoriji općine Cazin, izvlačenje i skrivanje letjelica iz aero kluba Bihać, izvlačenje ubojnih sredstava iz napuštenih skladišta JNA te operativni i obavještajni rad za potrebe glavnog štaba TO BiH.“



Dana 18. maja '92. godine koji se obilježava kao dan ratne jedinice izvršen je prelet aviona aero kluba Bihać sa aerodroma Ceravci na letjelište Dolovi kod Velike Kladuše. Sa tog letjelišta 15. juna '92. godine izvršen je prvi prelet za R Hrvatsku i time je uspostavljen zračni most pomoću kojeg je poslije iz R Hrvatske prevožen prijeko potrebni teret za narodne institucije USK. Tim preletom piloti Samir Beganović i Ristić Edvin su prvi piloti u Armiji R BiH koji su izvršili borbeni let preko neprijateljskih linija. Prvi avioni sa teretom i putnicima stižu 20. juna '92. godine. Naredbom štaba vrhovne komande Armije R BiH od 20.8.'92. godine formira se ratna jedinica Vazduhoplovna grupa Bihać. Jedinica je djelovala samostalno na teritoriji USK-a, pod direktnom komandom Štaba vrhovne komande Armije R BiH, poslije komande RV i TO Armije R BiH. Iako jedinica nije bila u sastavu V korpusa Armije R BiH u vrijeme zabrane letova, od strane UN-a iz sastava VG Bihać angažovana je pješadijska četa koja je aktivno učestvovala u borbenim djestvima na teritoriji USK. Za vrijeme jednog takvog zadatka smrtno je stradao i vojnik Beširević Nermin. Za svo vrijeme agresije pripadnici VG izvršili su prelete, prijem i otpremu oko stotinu aviona AN2, AN26 i šest helikoptera MI8 i drugih letjelica sa kojima je preveženo oko 600 t tereta, 70 ranjenika, dvije delegacije sa 13 ljudi, 3 tv ekipe i više pojedinaca. Ovakvim helikopterima upravljali su piloti Vazduhoplovne grupe koji su uz maksimalan napor izvršavali te opasne zadatke. Naglasio bih veliko zalaganje sadašnjeg predsjednika MZ i mješana MZ Ćoralići da se izloži helikopter sačuva od dalje devastacije i da se reprezentativno obnovi. Ovaj eksponat je već postao prepoznatljiv objekat u cijeloj BiH pa ga sve više posjećuju ekscurzije đaka, a i putnici prolaznici sve češće zastanu i fotografišu se pored njega. On je još prikazan na internetnim stranicama i tako postao dostupan mnogo većem okruženju. MZ Ćoralići i općina Cazin trebaju izvući maksimum iz toga i prezentirati ga u svojim promotivnim materijalima. Još jednom vam se zahvaljujem što ste svake godine bili ovdje sa nama i nadam se da ćete i sljedeće godine doći na ovo isto mjesto da se sjetimo ljudi i događaja koji su činili vazdušni most spasa. Zahvalio bih se pilotima jedriličarima iz aero klubova Bihać i Cazin koji će svojim revijalnim letenjem i izložbom na pisti aerodroma Ćo-



ralići koja će se dešavati također uveličati ovaj događaj. Zahvalio bih se načelniku općine koji nam je pomogao u realizaciji ovog događaja i zamolio ga da se obrati prisutnima, pojasnio je pukovnik Fazlić.

U svom obraćanju, načelnik općine Cazin, podsjetio je na obavezu obilježavanja značajnih datuma iz naše prošlosti. „I po obavezi, ali i tradiciji, svake godine u periodu od aprila do jula mjeseca obilježimo nekoliko značajnih datuma vezanih za našu Armiju i odbrambeno-oslobodilačku borbu. Odlukom OV kojom su definisani značajni datumi za općinu Cazin, preuzeli smo i dužnost da ih obilježimo na prigodan način i očuvamo sjećanja na važne događaje koji su se desili na području naše općine i cijele BiH. Izuzetno mi je drago da ovakvim događajima prisustvuje puno omladine, jer je važno da znaju i nauče kako je nastala naša država, kako smo se uspjeli odbraniti, koje smo sve žrtve morali podnijeti i kako smo osigurali današnju slobodu za sve. Jedna od važnih jedinica koja je pomogla našoj Armiji bila je i Vazduhoplovna grupa, jer je tada naša jedina veza sa ostatkom svijeta bio vazduh i zračna linija. Istina jeste da nam je trenutno najveća preokupacija budućnost i izgradnja bolje lokalne zajednice za sve, ali važno je i da se sjećamo svoje prošlosti.“ Prisutne su pozdravili i predsjednik Savjeta MZ Ćoralići Samir Hušić, Ministar za pitanje boraca u Vladi USK Ahmet Egrlić i predsjedavajući Skupštine USK-a Husein Rošić. Manifestaciji je pored mještana prisustvovao i veliki broj učenika OŠ Ćoralići i njihovih nastavnika.

IV PREDAVANJA I EDUKACIJE

Održano predavanje o načinu berbe i klasiranja malina i jagoda

Predavanjem je pored osnovne teme „NAČIN BERBE I KLASIRANJE MALINA I JAGODA“ obuhvaćena i trenutna problematika od interesa komercijalnim proizvođačima ovih kultura, i to:

- Prezentacija o radu SPZ „Agromerkantilija“ Velika Kladuša i mogućnostima otkupa ugovorene proizvodnje u ovoj i narednim godinama,
- Ažurnost u isplati otkupljene proizvodnje, i
- Briga o kvaliteti i zdravstvenoj ispravnosti plodova.

Kako se nalazimo neposredno pred berbu jagoda, iznimno je važno da su proizvođači upoznati o tome kako sa malo više pažnje u procesu berbe mogu poboljšati kvalitet i klasu plodova što direktno povećava njihov prihod u ovoj proizvodnji. Na području općine Cazin proizvodnja jagodastog voća ima stalni trend rasta. Od 2009. godine pa do 2011. godine proizvodne površine jagodastog voća povećane su za trideset puta (sa 14 na 404 dunuma), čemu je pored sigurnosti u plasmanu kooperativne proizvodnje sa navedenom Zadrugom doprinijelo i kontinuirano podržavanje ove proizvodnje kroz budžetsku stavku „Grant za razvoj poljoprivrede općine Cazin“.

Predavanje je organizirala SPZ „Agromerkantilija“ Velika Kladuša u saradnji sa Službom za razvoj i poduzetništvo općine Cazin i Udruženjem proizvođača voća i povrća Cazin. Izuzetno dobra posjeta od strane proizvođača jagoda i malina (njih 98) indikator je interesa za znanjem i poboljšanjem vještina u ovoj proi-

zvodnji. Prisutni proizvođači upoznati su i sa Aneksom Ugovora kojim su korigovane klase i iste svedene u dvije, što će im olakšati u postupanju sa ubranim plodovima.



Održan okrugli sto o korupciji i građanskom aktivizmu

U Kulturnom centru u Cazinu, 05. juna 2012. godine, održan je okrugli sto na temu „Manje korupcije-više radnih mjesta-značaj građanskog aktivizma“, u organizaciji PLOD Centra Bihać. Inače, riječ je o projektu podržanom od strane EU, a zajednički ga implementiraju PLOD Centar Bihać, Nezavisni biro za razvoj Gradačac i Udruženje za posao i poduzetništvo LiNK Mostar.

Prema izloženom, Projekat bi trebao da doprinese demokratskoj stabilizaciji, pomirenju i daljem razvoju u Bosni i Hercegovini kroz jačanje civilnog društva za borbu protiv korupcije u različitim područjima. Ispred PLOD Centra prisutna je bila Lorena Felić, projekt koordinator, dok je uvodničar i moderator okruglog stola bio dr. Genc Trnavci, profesor na Pravnom fakultetu u Bihaću.

U svom izlaganju prof. Trnavci je krenuo od etimološkog značenja riječi, definicije, zatim najčešćih područ-



Galerija Doma kulture

ja u kojima se pojavljuje korupcija, njenim oblicima i sl., skrećući pažnju na pravne mehanizme, procedure i institucije za borbu protiv korupcije. Govoreći na jednoj općoj razini, svoje predavanje prof. Trnavci je potkrepljivao i sa određenim statističkim podacima iz izvještaja Svjetske banke i drugih međunarodnih institucija.

Očekivani rezultati projekta su višestruki, a prevashodno bi trebao dovesti do smanjenja korupcije u civilnom sektoru, veći angažman NVO-a, kao i poboljšanje odgovornosti i kvalitete rada predstavnika vlasti.



Predavaci

Održana prezentacija o oružanim snagama BiH



Početak proljeća, u cazinskom Kulturnom centru, a u organizaciji Ministarstva odbrane Bosne i Hercegovine i NATO Štaba Sarajevo i gostoprimstvu općine Cazin, održan je okrugli sto pod nazivom „Uloga Oružanih snaga BiH“.

Na samom početku skupa prisutne je pozdravio općinski načelnik Nermin Ogršević. U svom obraćanju podsjetio je na slične skupove koji su se desili u našem gradu i na važnost dijaloga koji nadležne institucije ostvaruju sa običnim građanima. „Budući da je BiH zemlja na putu ka EU i NATO savezu, neophodno je da svi zajedno pratimo njene korake u zadacima koje treba riješiti“, istaknuo je načelnik Ogršević.

Brigadir dr. John Olsen govorio je o povijesti osnivanja NATO saveza, o strukturi članica, načinu funkcionisanja, ali i o današnjoj misiji NATO-a u svijetu i Bosni i Hercegovini. Naravno, bilo je riječi i o standardnima NATO saveza i procedurama koje naša zemlja treba ispoštovati na tom putu. Brigadir Mersida Mešetović, načelnica Savjetodavnog tima iz Ministarstva odbrane BiH, u svojoj prezentaciji se osvrnula na reformu odbrane i na procese koji podrazumjevaju primjenu standarda NATO saveza.

Sa druge strane brigadir Zoran Duspara, predstavnik Oružanih snaga BiH, smatra da ovakvi zajednički nastupi Ministarstva odbrane, Oružanih snaga i NATO saveza pokazuju opredijeljenost svih relevantnih institucija da BiH učine članicom NATO saveza i dijelom evropskog sigurnosnog prostora.

Simulacija formiranja koalicije u multietničkoj državi

Općina Cazin se sve više bavi edukacijom uposlenika, poduzetnika, mladih, ali i ostalih građana. Tim povodom je organizirana simulacija formiranja koalicije u multietničkoj državi za mlade aktiviste političkih partija u našoj općini. Ovaj vid



Rodna atmosfera

edukacije u kome se aktivno uči i praktično rješavaju društveni problemi organizirali su zajednički Općina Cazin i Fondacija Konrad Adenauer sa sjedištem u Sarajevu.

Inače, radi se o planskoj igri formiranja stabilne vlasti u zamišljenoj državi Fontaniji koja se po mnogim svojim osobinama može poistovijetiti sa Bosnom i Hercegovinom. Prema riječima moderatora ove simulacije i bivših stipendista Fondacije Konrad Adenauer Ehlimana Spahić i Nermina Keranovića, cilj ove simulacije je da se mladima Cazina približi način na koji se može stvoriti politički konsenzus, kako u zamišljenoj Fontaniji, tako i u našoj BiH.

Radionicu je posjetio i predsjedavajući OV Haris Ćoralić, kako bi pozdravio prisutne i ukazao na značaj edukacije mladih, posebno u oblasti političkog djelovanja i demokratskog ponašanja. On smatra da je od ključne važnosti ulagati u obrazovanje i dodatno usavršavanje mladih, koji će sutra biti aktivni nosioci političkih procesa u našoj zemlji.

Ovoj jedinstvenoj edukaciji prisustvovao je veliki broj mladih osoba iz Cazina koji su zajedničkim radom, saradnjom i višestranim kompromisom uspjeli obrazovati koaliciju u Fontaniji i na taj način ukazati na rješenje za vlast u našoj državi, uvažavajući interese svih naroda koji žive na ovim prostorima. „Obrazovanje koalicije u multietničkoj državi“ veoma je bitna simulacija, koja doprinosi razvoju ne samo demokratskih oblika ponašanja, već razvija i komunikacijske vještine i politički način sporazumijevanja među mladim osobama.

Važno je napomenuti da je ovo samo jedna u nizu od planiranih edukacija Općine Cazin. U narednom periodu pripremaju se ovakve i slične aktivnosti o kojima će građani biti blagovremeno obaviješteni.

V BILI SMO

Službena posjeta Grazu i Linzu

U petak, 1.6.2012. godine, načelnik općine Cazin, predsjednik NO Komunalno-stambenog fonda, direktor JKP „Čistoća“ i Direktor JP „ARC“ (Agencije za razvoj) doo, bili su u službenoj posjeti Udruženju Bošnjaka Štajerske (džemat Bošnjak u Grazu). Sastanak sa ljudima iz općine Cazin koji žive u okruženju Graza bio je na veliko zadovoljstvo obje strane. Obraćanje načelnika Ogrševića označilo je početak otvorenog razgovora sa svima koji su bili voljni komentarisati, predlagati i pitati. Predstavnici dijaspore u Grazu raspitivali su se o infrastrukturi u njihovim mjestima u Cazinu, o planiranim projektima i očekivanjima za naredni period, o mogućnostima glasanja u odsustvu i o pravnim posljedicama prihvatanja austrijskog državljanstva. U Grazu su predstavnici udruženja organizirali susret sa predstavnikom političke stranke zelenih,

Klaus Luger i Nermin Ogršević



Udruženje bošnjaka Steyr



U Grazu

gospodinom Stefanom Schneiderom i predstavnikom osiguravajuće kuće Donnau. Sa gospodinom Stefanom dogovorio se ponovni službeni susret u prostorijama Vijećnice grada Graza.

Slijedećeg dana nastavilo se sa posjetom. Ova puta predstavnici Općine Cazin posjetili su Udruženje građana Bosne i Hercegovine u Linzu, gdje su se susreli sa tamošnjim stanovništvom čije je porijeklo iz općine Cazin, ali i drugih općina.

Prvi čovjek naše općine obratio se svojim sugrađanima, predstavnicima naše dijaspore i stavio se na raspolaganje za svaku vrstu komunikacije, dogovora i razgovora. Naši sugrađani, na privremenom radu u tim mjestima, iskoristili su priliku i načelnika pitali o nadležnostima u graničnim prijelazima zbog rješavanja problema velikih gužvi i zastoja, zatim o infrastrukturi u selima i naseljima u kojima oni žive u Bosni, o rasvjeti, poljoprivrednim poticajima i sl. Osim toga, bili su jako zainteresirani da pruže pomoć svojim prijateljima, komšijama i sugrađanima u Cazinu.

Istog dana predstavnici općine bili su u posjeti Udruženju Bošnjaka u Steyru gdje su se susreli sa ljudima iz tog kraja i pričali o sličnim temama kao u Linzu.

U večernjim satima predstavnici općine Cazin sastali su se sa zamjenikom gradonačelnika grada Linza, gospodinom Klausom Lugerom, s kojim se razgovaralo o mogućnostima povezivanja na kulturnom, sportskom i poslovnom nivou, o mogućnostima usmjerenja investitora iz Linza u Cazin i o unapređenju djelovanja udruženja građana Bosne i Hercegovine u Linzu. U neformalnom dijelu druženja zamjenik gradonačelnika grada Linza prošetao je sa delegacijom općine Cazin kroz užu gradsku jezgru i još jednom potvrdio svoju zainteresiranost za saradnju sa općinom Cazin.

Grad Linc, koji ima budžet od cca 720 miliona eura, gradi zgradu opere koja košta 180 miliona eura, a na istoj toj zgradi radove izvodi firma našeg sugrađanina iz Izačića. Time se već pokazala konkretna saradnja na terenu, posebno u privrednom smislu, što je i najvažnije u vrijeme kada se cijeli svijet oporavlja od ekonomske krize.



U Linzu

Otvaraju se nova radna mjesta

Dana 16.04.2012. godine, polaganjem kamena temeljca u poslovnoj zoni Goričani u Bosanskom Petrovcu, ozvaničena je izgradnja tvornice peleta firme „Interwork“ iz Cazina. Riječ je o projektu koji ne poznaje granice u spajanju ljudi, investitora i prijatelja BiH. Uz mnogobrojne zvaničnike i prijatelje sa područja USK-a i Italije, domaćini i investitori nisu kri-li svoje zadovoljstvo ovim činom, a u njihovo ime prisutnima se obratio direktor firme Sanel Lidan. Predstavio je projekat u kratkim crtama, pojašnjivši da je riječ o proizvodnji 2 t peleta na sat. Pored ove fabrike u planu je i staklenička proizvodnja zeljastog bilja, čime će iskorištenost energije biti na visokom nivou, a njen završetak i puštanje u funkciju očekuje se do kraja godine.

Načelnik općine Cazin, u kojoj je sjedište firme Interwork, čestitao je svima na projektu i naglasio: „Ova investicija ohrabrujuće djeluje na sve nas. Čestitam onima koji su pokazali volju i želju za ovakvom proizvodnjom u našim krajevima. Bitno je da ovaj projekat uspije, jer ćemo time poslati poruku drugim potencijalnim investitorima da možemo i znamo raditi ukoliko nam se pruži prilika.“

Ermin Hajder, načelnik općine Bosanski Petrovac, imao je ulogu domaćina. On smatra da će ova firma ekonomski ojačati lokalnu zajednicu, jer se otvaraju nova radna mjesta. „U poslovnoj zoni gdje je svoje mjesto našla i ova fabrika biće uposljeno

oko 200 ljudi“, riječi su načelnika Hajdera. Na svečanosti polaganja kamena temeljca prisutan je bio i počasni konzul BiH u Italiji, dr. Diego Moscheni. Njemu se pridružila i gospođa Azra Popović iz bosanskohercegovačkog konzulata u Milanu.

Svečanu vrpcu na ulazu u građevinsko područje budućeg objekta presjekli su načelnik Hajder i počasni konzul dr. Diego Moscheni, dok su kamen temeljac uz dr. Diega položili i zlatni investitori Giorgio Eberle i Michelangelo Chieccchi. Važno je naglasiti da kišovito vrijeme nije uspjelo pokvariti svečanost, niti raspoloženje prisutnih, jer ovakvi i slični projekti daju nadu u bolje sutra.



Polaganje kamena temeljca

Svečano presijecanje vrpce



Na otvaranju XI Tradicionalnih invalidskih igara

Dvadesettreći april u MZ Gnjilavac obilježen je održavanjem XI Tradicionalnih invalidskih igara u organizaciji Saveza za sport i rekreaciju invalida Cazin. Manifestacija je počela učenjem fatihe i polaganjem cvijeća na šehidskom obilježju, a svečanost otvaranja održana je ispred područne osnovne škole.

O tradiciji ove manifestacije u uvodnom dijelu su govorili domaćini Ibrahim Baja Topić, Irfan Duric predsjednik MZ Gnjilavac i Mirsad Nuhanović predsjednik SSRI USK. U nastavku su se obratili i Ministar za boračka pitanja USK Ahmet Egrlić, predsjednik Skupštine USK Husein Rošić i načelnik općine Cazin Nermin Ogršević. Poželjeli su svim natjecateljskim ekipama uspješne rezultate. Načelnik Ogršević je istaknuo značaj održavanja ovakvih manifestacija, ali i potrebu za većom brigom o pravima ratnih vojnih invalida.

„Općina Cazin je obezbjedila pravnu pomoć za sva ona lica koja su nakon provedene revizije ostala bez prava na invalidninu. Ti ratni vojni invalidi su dovedeni u poziciju da zaštiti svojih prava mogu ostvariti jedino putem civilne tužbe što je pokazatelj da se ova pitanja ne rješavaju na kvalitetan način od strane zakonodavne vlasti u BiH“, rekao je prvi čovjek naše općine u svom obraćanju.

Zabavni program



Učenje Fatihe



Otvaranje igara

On je ujedno manifestaciju proglasio otvorenom.

U nastavku ovog obilježavanja održan je i zabavni program folklorne sekcije Osnovne škole Cazin I.

Discipline natjecanja XI Tradicionalnih invalidskih igara bile su: mali nogomet, stolni tenis, streljaštvo, bacanje kugle, skok u dalj, povlačenje užeta, šah i pikado.

Sportska takmičenja





Načelniku općine Cazin Nerminu Ogrješeviću je u četvrtak, 5.6.2012. godine, u Sarajevu uručeno specijalno priznanje "Najnačelnik regiona" za izvanredne rezultate u razvoju općine, izgradnji infrastrukture i stvaranju ambijenta za biznis. Ovo priznanje dodjeljuje Međunarodna nezavisna agencija Direkcija za izbor najmenadžera godine kao globalni autoritet na području regiona jugoistočne i srednje Evrope. Projektom „Najmenadžer“ dodjeljuju se priznanja najuspješnijima na polju biznisa, nauke, sporta, a dobitnici priznanja nerijetko su načelnici i gradonačelnici uspješnih općina i gradova iz regiona. Ove prestižne nagrade dodjeljuju se i ministrima u vladi, ambasadorima i ostalim uglednim ličnostima iz zemalja koje obuhvata ovo područje.

Ovim priznanjem se općina Cazin uvrštava u sami vrh općina koje su predanim radom i brojnim realiziranim projektima za kratko vrijeme napravile veliki napredak u privrednom razvoju. Prema riječima načelnika Ogrješevića, ovo priznanje je i priznanje svim građanima općine Cazin. „Hvala onima koji su me izabrali za najnačelnika regiona, ali hvala i onima zbog kojih sam to što jesam, a to su moji sugrađani, moji Cazinjani. Ovo je naš zajednički uspjeh, jer većinu stvari radimo u saradnji sa građanima i upravo zbog njih“, emotivno je zahvalio prvi čovjek naše općine.

Svečano uručivanje priznanja održano je u sarajevskom hotelu Holiday Inn, uz prisustvo velikog broja menadžera srednje i jugoistočne Evrope, političkih i javnih ličnosti ovog regiona. Ovaj dvadesetšesti izbor polučio je 24 nagrade za najmenadžera i 16 nagrada uspješnim pojedincima za njihov doprinos u razvoju biznisa i otvaranju novih radnih mjesta.

Cazinfo INFO BILTEN OPĆINE CAZIN

TEHNIČKI PODACI

Izdavač: Općina Cazin

Urednik: mr. Irma Alićajić

Lektor: EVRON d.o.o. Banja Luka

Dizajn: EVRON d.o.o. Banja Luka

Štampa: GRAFIS d.o.o. Cazin

www.opcinacazin.ba

e-mail: press@opcinacazin.ba

